

Matumuuna Naalakkersuisunit Inatsisartut Suleriaasianni § 33 naapertorlugu aalajangiiffigisassatut siunnersuut tulliuuttoq saqqummiunneqarpoq:

Atlantikup Avannaata Kitaani aalisarneq pillugu siunissami nunanik tamalaanik suleqateqarnissamik isumaqatigiissusiap allannguutissaata Danmarkip atuuttussanngortitsineranut Kalaallit Nunaanni Namminersorlutik Oqartussat isumaqataallutik nalunaaruteqarnissaannut Inatsisartut aalajangiiffigisassaattut siunnersuut.

Saqqummiussissut

(Aalisarnermut, Piniarnermut Nunalerinermullu Naalakkersuisoq)

Siullermeerinninneq

Kalaallit Nunaat Naalagaaffeqatigiinnerup iluani Atlantikup Avannaata Kitaani Aalisarnermi Suleqatigiiffimmi (NAFO-mi) ilaasortaavoq, aaqqissuinermi taaneqartoq Danmarki Savalimmiut aamma Kalaallit Nunaat sinnerlugit (DFG). 2007-imi ukiumoortumik ataatsimiinnermi Atlantikup Avannaata Kitaani Aalisarneq pillugu isumaqatigiissutip (tamassuma kingorna isumaqatigiissut) nunat arlallit siunissami suleqatigiinnissaat arlannik allannguuteqarnissaa NAFO-p aalajangerpaa. Isumaqatigiissut atuutilersinneqassappat NAFO-mi suleqatigiit $\frac{3}{4}$ -iisa, tassa aqqaneq marluusunit arfineq pingasut, isumaqatigiissut akuerissavaat.

1978-imi isumaqatigiissutip maannakkut atuuttup atuutilernerata kingorna aalisarneq pillugu politikimi ineriartorneq tunngavigalugu isumaqatigiissut annertuumik nutarterneqarpoq. Isumaqatigiissutip imaata allannguutai kalaallit soqutigisaannut akerliunngitsutut nalilerneqarput. Akerlianik isumaqatigiissummi allannguutit Kalaallit Nunaannut tigussaasumik iluaqutaapput, tassa missingersuutit pillugit aalajangersakkat nunanik ilaasortanik minnerusunik mianerinninnerusut isumaqatigiissumi ilanngunneqarmata. Tamanna isumaqarpoq isumaqatigiissuteqartut ukiumoortumik akiliutaanni ilaasortat 300.000-it ataallugit innuttaqartut akiliutaat missingersuutinit tamarmiusunit annerpaamik 12 %-inut killilerneqartut. Tamassuma kinguneranik Kalaallit Nunaata NAFO-mi ilaasortaanermini akiliutai annertuumik annikillissapput, tassa DFG-ip NAFO-mi ilaasortaanermini akiliutai missingersuutinit tamarmiusunit maannakkut 18 %-it missaaniimmata.

Isumaqatigiissutip imaata allannguutai ukuupput (tullerriiarlugit naalisarlugit saqqummiunneqarput):

- FN-imi tamanna pillugu isumaqatigiissummut qisuariaatitut mianersortumik periuseqarnissap atuutilersinneqarnera. Taamaalilluni immami uumassuseqartut

sunneeqatigiittarneranni avatangiisit mianerineqarnissaat annertuumik isumaqatigiissummi ilanngunneqarpoq.

- Aaqqissuussaannermi allannguisoqarpoq, taamaalilluni nunarsuup immikkoortuini allani aalisarnermik aqutsinermi suleqatigiiffiit assigalugit ataatsimik Kommissioneqalerpoq, taanna maannamut Siunnersuisoqatigiiffiutigaluni Aalisarnej pillugu Kommissioniuvoq.
- Unioqqutitsilluni, Killilersugaanngitsunik, Nalunaarutigineqanngitsunik aalisarnermik (tuluttut naalisarnejartoq IUU) akiuiniarnej pillugu aalajangersakkat atuutilersinneqarput.
- Nunat tamat akornanni aalisarnej pillugu isumaqatigiinniarnerni ataatsimiinnernilu alaatsinaatsutut peqataasarnissaq pillugu aalajangersakkat atuutilersinneqarput.
- Naggasiullugu akerleriinnernik isumaqatigiissitsiarnerni periutsimik atuutilersitsisoqarpoq, siunertaavorlu isumaqatigiisummik atsiortut marluk arlallilluunniit akerleriissuteqarnerisa qaangerniarnissaannut taanna sakkuussasoq.

Naliliisoqarpoq isumaqatigiisummik akuersinermi Kalaallit Nunaanni inatsisunik allaffissornikkullu periutsinik allannguisoqarnissaa pisariaqassanngitsoq.

Naalakkersuisut inassuteqaatigaat Atlantikup Avannaata Kitaani aalisarnej pillugu nunat arlallit siunissami suleqatigiinnissaat pillugu isumaqatigiissutip allannguutai Inatsisartut akuerissagaat. Danmarkip Savalimmiut aamma Kalaallit Nunaat sinnerlugit isumaqatigiisummik akuersissappat isumaqatigiissut aamma Savalimmiut akuereqqaassavaa.

Taamatut oqaaseqarlunga siunersuut Inatsisartunut suliassanngortippara, pappilissallu agguanneqartut innersuussutigalugit.